

Roslinda sudah berpatah arang, selamat tinggal olahraga

# Keputusan muktamad!

Oleh MASZUREEN HADZMAN  
sukan@utusan.com.my

**KUALA LUMPUR** - Ratu lompat bergalah wanita negara Roslinda Samsu tidak akan berganjak daripada keputusan untuk bersara dan melupakan Sukan SEA 2013, November ini bagi memberi tumpuan kepada kerjaya baharu sebagai guru serta jurulatih.

Roslinda yang pernah menggenggam empat pingat emas Sukan SEA, selain pernah memegang gelaran jura Asia menganggap kariernya sebagai seorang atlet olahraga sudah

berakhir.

"Saya sudah menamatkan pengajian dan perlu bekerja setelah 14 tahun bekerja keras untuk menyumbangkan pingat buat Malaysia.

"Minat terhadap olahraga masih ada, tetapi keinginan untuk bertanding sudah tiada dalam diri. Jadi tiada guna untuk saya teruskan karier saya sebagai atlet olahraga," katanya ketika dihubungi *Utusan Malaysia*.

Roslinda, yang bakal berusia 31 tahun pada Jun ini memperoleh ijazah Pendidikan Jasmani daripada Universiti Putra Malaysia (UPM), Ok-

tober lalu dan mula bertugas di Sekolah Sukan Malaysia, Pahang sejak sebulan lalu.

Menurutnya, Kesatuan Olahraga Malaysia (KOM) sudah dimaklumkan mengenai keputusan untuk bersara, namun sama ada keputusan itu diterima atau tidak, dia tetap tidak akan berganjak.

"Pada mulanya mereka agak terperanjat tetapi pihak KOM terpaksa akur dengan keputusan saya untuk bersara. Saya tidak boleh penuhi permintaan orang lain untuk terus sumbangkan emas buat negara," jelasnya. Dilahirkan pada 9 Jun 1982, Roslinda

melakar sejarah olahraga negara apabila merangkul emas Kejohanan Trek dan Padang Asia (ATF) 2007 di Jordan. Dia juga memenangi perak Sukan Asia 2006, selain gangsa ATF 2005.

Malah, sepanjang menyertai Sukan SEA dari 2001 hingga 2011, Roslinda telah menyumbang empat emas, selain pernah mewakili Malaysia ke Sukan Olimpik 2008 di Beijing dengan melayakkan diri secara merit.



ROSLINDA  
SAMSU